

四庫全書

集部

欽定四庫全書

鶴林集卷八

宋 吳泳 撰

外制

謝奕昌授知閤門事兼客省四方館事制

勅朕爵以馭其貴仁以篤於親戚畹不除侍臣固曰至公之無黨閤門仍眎從橐未嘗寵數之不優申錫明綸式昭異渥具官某履恂恂之行修抑抑之儀雅稱謝庭諸子之佳不有竇氏長君之貴周旋朝序之久進止禮

容之嫺用解右韉陞華上閣况典掌賓臚之事而閱稽
天仗之藏朕之待卿亦已厚矣爾其念寵恩之難報思
高祿之易盈尚循素風式迪忱訓可

謝奕禮知閣門事兼客省四方館事制

勅朕疏榮貴戚迪簡良材長君少君之賢夙推望族東
閣西閣之序聯上清班雖曰示恩未嘗撓法具官某仁
行義處禮習詩明居上相之鄉籍甚家聲之著入小侯
之學薰然德性之良素富貴而不以富貴自驕見紛華

而不以紛華為悅寧屈文階之峻式共武衛之嚴太微之座既明載橐矢箠謁者之星有爛俾贊賓臚毋愆於儀毋貳乃行庶幾承爾祖之烈可以教天下之嫻可

謝奕禮換授眉州防禦使帶御器械兼幹辦皇

城司制

勅后族戚里不除文臣從官建炎詔也朕何敢逾具官某松閣故家椒房懿屬而能被服詩禮縹藉典刑蓋嘗升諸月卿之清寵以書殿之邃尚循法度控避職名貴

而能謙於汝見矣通義兵防之任禁庭韉佩之班典司
皇居悉以命汝汝其思名器之不易惟文獻之自持保
此寵光以永終譽可

謝奕昌換授和州防禦使帶御器械兼幹辦皇
城司制

勅祖宗之法后族戚里無得任文臣班法從也雖有濟
美之才亦屈換授之典具官某氣資閭裏性行淑均生
於上相之門克謹厥德貴以覩天之妹不愆于儀自擢

寘于周行已平躋於華路而乃辭書殿之遽易武階之
崇晉秩扞防屬韃左右朕之待汝義弗敢私薄氏以仁
善保家馬侯以清約守位尚終令譽無替前猷可

謝采伯換授蘄州防禦使提舉佑神觀免奉朝
請制

勅東漢后族不過九卿國朝戚里不除侍從雖服文雅
必換武資蓋公法也具官某履行孝謹稟資溫純出王
謝之故家為鄧陰之尊屬而不有貴胄蔚然儒風進女

誠以奉坤儀緝聖謨而裨乙覽肆予嘉嘆示以優恩擢從戎監之班對授兵防之任非特私于名器亦庸寵乎才良益茂先猷以俟甄擢可

謝采伯授州觀察使仍舊提舉佑神觀免奉朝請制

勅朕維先王建國親諸侯何分異姓伯舅加勞賜一級當有殊恩矧伊近戚之尊豈愛懋官之寵具官某器懷競爽儒雅扶輪雖胄出相閥而不以相閥自高雖嫻連

掖庭而不以掖庭致貴每說學於縉紳之園曾爭名于
俊造之場固曰汝能當為朕屈昔野王以德顯尚難陪
與於列卿而樊侯以經名不過徙封于東國爰覽撫章
之上既知故典之詳仍啓男邦進升廉察母曰爾身之
在外尚思忠德之輔君往承之休以輔予治可

俞朴授權知閤門事魚客省四方館事魚幹辦
皇城司制

勅具官某朕惟朱華之二閤當太微之法宮非得英流

不在茲選爾戎容武毅材畧偉閔沂王肺腑親也屬韃
帝右祇事端門賓禮朝章素所諳熟今命汝總知館事
其句傳明命糾正官聯俾庶陛之間肅莫敢犯則予汝
嘉可

韋興宗授州防禦使依舊知閣門事制

勅昔我孝宗皇帝書老氏三去之戒賜爾父璞明訓具
在世服儒素澹如也具官某王孫之賢后族之彥飭身
自警循禮義之中被服不華絕貴游之習屬韃左右閔

歲滋多近已晉長朱閣矣解帶衛之勞秩軍防之峻尚
共乃事毋忝厥考可

韋興宗授州觀察使依舊知閣門事制

勅朕永懷沂郇誕正官名既于內外之親錫以褒遷之
寵具官某顯仁茂族平樂諸孫於靖惠亦近屬也稟性
闡爽受才敏宏畫自警之圖鵠有仁賢之譽守三去之
戒更無奢麗之風自董朝儀不愆賓禮用輟州防之舊
兼陞廉使之華尚對恩榮並肩忠報可

楊鳳孫換授福州觀察使知閤門事制

勅朕嘗觀國朝佐戚之制無任文臣侍從之官雖負英才亦屈彝憲具官某生高明之胄蹈夷雅之風自官中都蔚然嘉譽既煩之以外府受藏之冗又佚之以西廂奉祠之清而乃執德謙沖露章控免爾之辭其職則是矣朕每念思齊大任之德未報不顯申伯之功弗酬既乎支孫積有餘慶寧換觀風之印仍知上閤之班束帶與賓客言尚無越禮升車有澄清志猶可澤民往懋淑聲

迪忱猷訓可

楊鳳孫授中大夫楊蕃孫授朝奉大夫楊衍孫授朝請郎楊纘授朝請郎制

勅具官某等昔我文母保佑朕躬有大功於天下今升自闕宮祔于太室戚畹內外嘉與推恩蓋報其親者不敢弗盡也爾等生自高華素于富貴有敬謹威儀之度無康好佚豫之失並升一秩宜懋厥官毋曰居寵而不思危也可

許堪授閣門宣贊舍人差充京湖制司計議官
兼發遣棗陽軍制

勅具官某京西為上流重鎮而棗陽又京西重戍也爾
奮自右科素有才具茲命乘障帶上閣之班計元幟之
議非但華之以美職爾邊上吏士宜厚撫摩勿太察勿
太懦使人人皆兵為我之用則惟汝嘉可

張澂授閣門宣贊舍人制

勅具官某閣門榮祇館職宣贊舊隸西臺選亦華矣爾

勲臣之後秀謹而腴頃以父憂解官亦既三載率禮不越以終其喪可為篤孝夫孝於事親必能忠於事君其就故官以承新命可

葛忱授閣門宣贊舍人制

勅具官某閣門眎館職宣贊又在言語之科國家不輕畀也爾儀範謹飭辭令閒華故命汝束帶與賓客言汝毋曰此官可以格法授也可

林柘授閣門宣贊舍人制

金匱要略卷八
勅具官某宣麻舍人清視館職爾開爽敏給右科自奮
頃將明命祇謁寢園成禮而還法當酬賞茲越候班之
秩徑升賓贊之階可謂聞華往其欽謹可

張祭授閤門祇候制

勅具官某看班熟識儀數歷五年然後祇事上閤此熙
寧舊典也爾祭恪謹桀度習嫻朝容歲月未深乃援郎
陸引彛比以請朕勉從之若夫躡升弗已則有馭幸之
法在可

鄭煥宗授武德郎依舊閣門宣贊舍人制

勅具官某宣麻舍人共職五載則與轉官嘉泰令典也
爾進趨閒華音吐鴻暢贊命上閣已及七年亦可謂勞
矣何靳一官不以華汝耶益單忠勤對揚休寵可

王師石授閣門祗候制

勅具官某閣門乃祖宗儲才之地而祗候之班在文臣
為館職其選嚴矣爾生自將門通于儒學其在定遠以
孤城抗敵宰資興以一身當寇仁者之勇也祗事上閣

徑點清班朕蓋以功授往共厥服益勵乃猷可

何嗣武授閣門祗候仍知滁州制

勅具官某亦也可束帶立于朝則使之主賓由也可千
乘之國則使之治賦知効一官事不貳適古之道也爾
為滁陽守治兵理財豈不足以壯吾藩屏顧迺屢請欲
帶閣職以行是主兵治賦合而一之也姑華爾躬朕之
所望蓋不在此可

孟琳授閣門祗候制

勅具官某東西上閣門禮均法從而祇候清眎館職祖宗朝非諳識典章者不輕畀也爾以時髦嫻於朝度既輟祥琴之御欲還束帶之班朕方以孝治天下豈惜故官不以命汝可

房應龍授閣門祇候仍舊幹辦御前忠佐軍頭
引見司制

勅具官某閣門眎文臣為館職其選重矣爾精明敏達和風祇修幹于御營厥有成績故命汝祇事上閣束帶

與賓客言益楮其勤往共厥事可

陳圻差充閤門祇候制

勅具官某閤門祇候在文臣為館職豈可責以求財此
司馬光之言也爾仕於筦庫欲干祿者也非求財者也
潔彼冗濁寘之清華亦何戾憲章之有可

辛思特授州防禦使依舊知閤門事制

勅橫階非殊恩不遷遙郡非顯庸不轉茲褒閤使難徇
彝章具官某生長將門習嫻賓禮逮事寧考既于沖人

左右橐鞬久領內庭之直句臚殿陛遂司朱閣之儀爰
推解帶之恩特畀州防之任祇承寵數益懋忠勤可

辛恩授知閣門事兼客省四方館事兼幹辦皇
城司制

勅朕惟東西上二閣當太微法官之北涖職其間非才
不畀具官某韞氣沈毅受材敏閎生于將家曉暢軍務
逮事寧考嫻于朝章茲擢自於屬鞬俾統司於賓謁爾
其句傳明命糾正官聯俾堂陛之儀肅莫敢犯則予一

人以懌可

吳潛授秘閣修撰兼江西路計度運副制

勅具官某朕愛護人才如植嘉木息之以夜氣潤之以膏雨皆所以養其根而疎其實也爾頃使江東蔚有治狀一從家食朕每念之今復以江西漕餉起家矣兵盜之餘民食為急輯疲氓戢貪吏使西人如饑之望歲亦猶東人之去後見思則汝之此行始為稱指可

顏頤仲授直秘閣兩浙運副制

勅具官某二浙素號劇部凡領轉輸者率為尹京之儲
紹舊典也爾闔爽而智敏彊而能假守桐廬蔚有善狀
曾未滿歲俾丞大農界之畿甸之漕亦可謂越彛比矣
仲尼有言敏則有功公則悅務持其敏而首奉乎公朕
深有望焉可

侯忠信授左武大夫依舊宮觀制

勅朕聞先王以立武為善經中國以除戎為大事儻能
稱職何愛賞官具官某沈鷙而有謀朴忠而能勇秉麾

海道馳驅戎馬之間喚伏閤門服習禮文之內雖在祠
庭之均佚每遇武庫之前勞比緣控陳茲用褒擢因之
以戎圍之任華之以左武之階往其欽承服此嘉命可

羅晟以廣西擒捕海寇授朝奉大夫制

勅具官某漢列侯受封以職餽餉居野戰畧地之右爾
守合浦當海瀕盜弄之衝能使軍有流錢士無後顧以
底成績非區畫之善不能也揆諸漢典豈在諸將下增
秩二階用勸來者可

趙師楷授江淮荆浙福建廣南路都大提點坑
冶鑄錢公事制

勅具官某周外府掌邦布之入出以待邦之用布即泉
也貨泉之司而以承於外府者掌之尚周人遺意也矧
爾宗孝之英吏幹之敏使乎廣右曾以最聞今舉九路
百八州之計併于一大有司汝其為朕扼弊姦集公利
使寶冶之藏饒羨圜府之法流通則國家深有賴焉可
趙勝特轉某州防禦使除主管殿前司公事制

勅周公恤茲虎賁而立政之書作祈父轉予爪士而小雅之刺興凡典我王旅愛人撫士能使周廬內外溫如挾纊則朕亦何愛爵賞不以褒寵之耶其官某召從淮浦來扈殿巖恂恂有古良將之風介介為士君子之行異時羽林天仗卒多不葺而汝能修之三衙赤籍皆以賂補而汝能革之戎容精明軍務釐飭是用遷以兵防之秩正以連帥之名不但榮其身而已也倚仗言事尚竭告猷可

王安行特授州防禦使依舊提舉宮觀制

勅橫班序爵固存定法之常解帶遷官或出特恩之異
具官某韜藏武畧曉暢戎情築定遠之城以身而護塞
調安封之卒不踰月而擒渠右韃之賞未酬左武之階
猶舊爰念勤勞之久肆升捍禦之班仍秩祠庭式對宸
渥可

王橐授州防禦使制

勅朕宅丕后邁祇先猷廣廈對儒臣之英路門徹皇祖

之訓恩榮所被內外惟均具官某淑謹有儀勤明寡過服于貂省之事在朕龍潛之時屬燕清閒精思典學顧瞻殿宇名以緝熙汝則承之以宣朕旨令既終篇第賞何愛一官益楙其勤往服休命可

趙立夫授守太府卿兼刪修勅令官兼知臨安府制

勅具官某京師王化之首嚴者以察為威懦者不敏於事皆非朕所尚也爾謹厚而密柔嘉而明蚤為九卿尹

正畿甸雖不為灼灼之名如顧少連不求赫赫之譽如
魏少游而上下相安咸以為便然朕之所以望汝者又
非前日比也俗流化敝汝其正之官邪吏偷汝其威之
若能體十二條之訓守之勿墜則邦畿千里朕可以無
慮矣可

林景衡權發遣德慶府制

勅具官某束帶立于朝與治千乘之國職守固自不同
也然德慶為郡其民蠢其俗野非嫻於禮者莫能治之

爾右庠諸生策名進士祇事上閣進止舒徐可以為良
二千石朕方仰法孝宗于所不聞知處留意爾毋謂廣
遠皇明不及也可

許堪權發遣德安府制

勅具官某德安為郡竟陵接其西棘陽介其北重鎮也
爾氣姿闡爽諳曉戎情曾未踰年歷守三郡仍贊中權
之畫且聯上閣之班今事任亦不輕矣爾其申討軍實
葺厚城堡使托裏之計密而風寒不侵則朕將有賴焉

可

曹順權發遣應天府制

勅具官某睢陽古郡會也唐守之以遮蔽江淮國家因之以肇基王業淪胥之久再歸版圖牧守之任實艱其選爾沈鷺善謀忠勇寡二攝承邊障亦幾年軍務民政已著嘉績今會汝為真往哉毋棄爾成可

孫應龍權發遣德慶府制

勅具官某德慶古康州中興潛藩也郡將之任每難其

人爾奮身右科屢采邊障民庸戎事曉暢諳悉故命汝分左符以往遠乃猷裕乃事俾內外粗定則予汝嘉可
畢衍權發遣德慶府制

勅具官某德慶古康州也朕以中興潛邸不輕畀其人爾練更民庸曉暢戎事綏禦內外必能得情用是委汝共理我孝宗嘗曰于所不聞知處留意汝毋謂廣遠皇明所不燭也可

朝散郎直華文閣權知興元府主管利路安撫

司事陳隆之授朝奉大夫制

勅具官某往歲北騎馳蹂閩中握兵之將羆虎熊羆之
士裒凶搆逆助寇為聲勢者不但一賊珍耳爾以參謀
勇於赴難手鋤元惡卒渙其羣制府以狀聞朕何愛爵
秩不以旌汝然常勝者兵家之所慮數倖者往哲之所
戒汝其謹之重之周之密之毋希功滋事可

郝容權發遣均州軍州兼管內安撫京西路兵
馬鈐轄均金房達州兵甲事制

勅具官某武當在盛時為山水郡往歲北兵闖署關涉
均水繇襄鄧以蹙殘金遂為上流重鎮出總邊瑣實難
其人爾稟姿驍雄洞識機畧命為郡將魚總兵鈴以阨
金達房陵之衝其思練民丁嚴斥堠鎮壓一面以寬朕
西顧憂可

繆夢達權發遣瓊州瓊管安撫制

勅具官某瓊山在海中洲居控扼生熟黎峒一百二十
聚落廣南要地也郡將之任蓋難其人爾沈鷺而明果

藝以達專城之任今以命汝惟恩威並用可以使將士
惟忠信素孚可以行蠻貊念茲鑒茲俾朕無南顧之憂
可

繆夢達權發遣宜州兼廣西兵馬都監制

勅具官某宜城控牂牁諸部嶺南要衝也郡將之選蓋
難其人爾沈鷺而明果毅而達專城之任今以命卿惟
恩威並用可以使將士惟忠信素孚可以行蠻貊念茲
鑒茲俾朕無南顧之憂可

王寔改知光州主管蔡州安撫司事制

勅光古弋陽襟帶淮甸當蔡息道接界邊疆具官某寬而強勇而義牧人御衆有翼有嚴邊祲方騷赤羽如日溝河勺水一葦可杭故從濠梁易填茲土仍秩右武就分左符勉圖康功以答隆遇可

尤燭授淮南路運判兼權知廬州主管淮南西路安撫司公事制

勅具官某朕愛護人才如護嘉禾長短小大各裁其偏

而器使之蓋欲以待材用之宅也爾乾道淳熙名臣之
孫浚明而文淹洽而辨一擯七載才益老氣益堅悍抵
掌談功名益不衰朕嘗試之樞掾矣淮淝重鎮帥事久
虛是用輟汝將輸共貳其事爾其念食者生民之命兵
者不祥之器謹之重之毋使佳兵而食不足則惟汝嘉
可

張可大授武顯大夫添差淮南西路馬步副總管
依舊知壽春府制

勅具官某壽陽前控陳潁後蔽光豐寔今南北重鎮爾忠忱果毅為諸將所推往乘其隙於諸叛連衡之衝乃能修築城堡調壹歸附獨隱若一敵國焉亦可嘉矣何惜一階不以旌汝益壯爾猷嗣有褒用可

李虎授左武大夫依舊達州刺史知淮安州制勅趙苞對陣之語孰如徐庶之思念其親溫嶠絕裾之風豈若馮勤之貴顯其母不圖薄俗復見斯人具官某曹出山西聲馳漠北段槍而刺元惡頓清淮海之塵尺

箠而鞭羣兇盡拔高郵之幟功雖高于李愬義弗背于
張飛嫪言護草之懷用有翟弗之請載披柔牘特晉崇
階求忠臣于孝子之門既膺妙簡令刺史居牧伯之位
仍懋顯庸多而戰功光我休命可

李大聲授武節郎遊擊軍統制制

勅具官某結髮從軍累能辦賊戍濠備塞以驚勇聞今
又進秩而陞于制府矣松江千里吏閥如羆虎當道朕
何憂可

趙汝擢授州刺史權知德安軍府制

勅具官某唐制州刺史即郡太守也國朝以遙刺典藩
名稱少異汝以宗英曾守淮郡捍城禦侮厥有成績朕
已增秩因任矣德安古鄖子國仍以使名責之州紱往
懋乃功可

江顯授常州刺史充親從第三指揮都指揮使
制

勅具官某古者天子必有親軍今之親事親從是也爾

沈勇忠實夙夜有勞比及三年實應遷格仍都使號兼
綰州符勉竭勛勤以報榮遇可

袁晟授湖州刺史充殿前指揮使左班都虞候
依舊押行門祇應制


勅具官某朕有熊羆之士掌先後王以虞度眎候為職
其選嚴矣爾糾糾武夫之勇番番良士之忠比及三年
厥有成績肆升華于州刺仍祇事于行門思懋厥修少
寬予恤可

王亨授忠州刺史制

勅具官某武臣副使非有功效顯著不帶遙郡令格也
爾沈鷺善謀忠勇寡二控扼睢口已跨一年捍城之功
實冠諸將茲軼彝比陞刺望州體予異恩懋爾嘉績可

劉廷美授秉義郎開州刺史充京西路兵鈐制
勅具官某襄州上流重鎮邇者叛賊嘯兇墮我金城雖
握兵之將驅虎熊羆之士弗能扞爾以樊城土豪乃能
獎率義旅驅賊徒而殲之昔人稱一寨戶之勇過于禁

兵百人子之謂矣捷書夜聞朕用嘉嘆陞華遙刺俾總
兵鈴尚有功見知之意可



欽定四庫全書

集部
鶴林集卷九
十

詳校官庶吉士臣瑚圖禮

主事臣呂雲棟覆勘

膳錄監生臣南光祇

膳錄監生臣汪本中

欽定四庫全書

鶴林集卷九

宋 吳泳 撰

外制

陳洵益授隨龍右武大夫慶州團練使制

勅朕惟太僕之道王聞於禮贄御之憂國見於詩給事
官省之臣儻能旦夕承辟左右宣勞則朕亦何愛官爵
不以榮寵之耶具官某專良而慧敬謹而能留代邸者
有年潛躍皆隨於龍馭居王朝者累載緝熙常侍于燕

閒屬解職於內庭遂轉歸於銓部載橐御器仍典戎團
爾其服詩禮之箴佩忠信之冑毋嫉壯士毋進側言各
率其屬惟正直是與則予汝嘉可

葉俊授郴州團練使充親從親事官都指揮使
制

勅具官某羽林天之壁壘武衛王之爪牙地禁職嚴盍
遴其選爾老於親從擢自都將忠勇勛力皆有可稱畀
之州團服我休命可

蔡興授州團練使提舉宮觀制

勅祈父之詩曰王之爪牙胡轉予于恤夫不轉于憂恤而轉于安佚者是固六軍之士所深望也具官某沈毅而勇淑均而良神策諸軍既共武衛濠梁大郡久帶戎團今旅力既憊矣式正使名畀休禁務尚體閑勞之意可

李實授同州團練使慶元府兵馬總管制

勅漢虎賁宿衛積久必遷唐神策正官依資改授今之

三歲轉員尚其制也具官某以拳勇選以忠實著既掌先後王之旅又兼左右廂之屯比及三年厥有勞効進戎團之任陞總府之華茲蓋優恩爾尚迪果毅以對休寵可

李載授州團練使依舊帶御器械制

勅具官某國朝以皇城使比文臣為亞卿其選重矣每三歲一遷厥有彝比爾才毅而武機沈而雄躬佩橐鞬日侍左右亦既有勞矣落遙刺之階進戎團之任尚仍故職往服新休可

辛思授州團練使依舊帶御器械制

勅唐舊典皇城宮殿諸門命官賞其開闔之節奉其管鑰而出納之謂之城門郎今之皇城司是也然非橫行御帶不領其事具官某才毅而武機沈而雄躬佩橐鞬日侍左右亦既三年矣落遙刺之階進戎團之秩尚仍故職往服新休可

倪祖常授軍器監主簿制

勅具官某見喬木而思世臣愛甘棠而思召伯昔嘉定

金史卷之八十三
卷九
更化爾考思為侍從之臣立朝有桀度論事有風槩朕
嘗思得若人而用之以爾實世其家擢司奏郎茲又屬
戎監以官其能若厥父菑厥子乃弗肯播則非朕之所
聞也可

朱復之授軍器監主簿兼權知惠州制

勅具官某惠陽於東廣為望郡比者戍兵煽亂跨州連
邑皆吾牧守不能綏御之遂干我王畧爾經濟之才器
識宏邁光澤討賊曾上首功儒者之知兵予之謂矣博

羅新燬爾出長之武監舊官爾薄正之尚其一乃力宣
乃猷毋謂廣遠於人所不聞知處留意以答揚孝祖之
光訓朕將有望焉可

黃夢龍特補修職郎差權萬安軍陵水縣主簿
兼縣事制

勅具官某黎人之為陵水患久矣爾父奮不顧身采入
其阻僅能復所侵邑竟死王室朕念功未已任汝以官
爾宜裕乃父功長于新邑可

康守正授容州觀察使特改添差兩浙西路馬
步軍都總管臨安府駐劄不釐務制

勅朕脩文德以來遠人棄細故而階大道凡列藩衛並
為王臣具官某生長殊鄰拔援貴冑截我淮浦豈無嬰
城拒守之私歸予齊疆終有慕義來賓之意昔涖撫于
屬國今召趨于闕庭涵濡華風密邇皇化既擢升于庶
使仍典總于戎旃朕方弘孝廟之規模爾宜効蕭巴之
恭順往祇明命嗣有寵休可

王溫補忠訓郎差充忠勇諸軍統制應天府駐
劄王亨授武翼郎差充應天府兵馬鈐轄制
勅具官某等朕撫有方夏悉主悉臣爾本吾編氓久隔
王化挈下邳而歸順控濰口以扞邊備罄忠勞合加寵
數用峻躋于武爵仍總率于新軍益懋厥功嗣有褒用
可

張天綱授武翼郎添差隆興府兵馬鈐轄制

勅某春秋書潞子之爵漢史紀陽侯之封既曰來庭詎

無錫寵矧爾仕於偽國隔絕中華天討所臨窮而歸我
朕以天地為心靡不含覆如守者挈屬內附尚冠帶而
臣妾之則汝天綱何惜武爵戎銓不以畀汝可

王克謙起服淮西安撫司准備差遣制

勅具官某銓未試而筮仕喪未終而入官皆非古也爾
甫受一階適丁家難淮堧闔帥請以驅馳用頒奪情之
恩宜服移忠之訓可

鄒公銳起復添差東南第二副將制

勅具官某子墨縗經禮之變也後世奪情之典實倣乎此爾奮身右庠曉暢軍務遭憂之久朕惜其才起而用之尚求忠臣於孝子之門可

張應珙起復差充建康府都統制司幹辦公事

制

勅具官某三年之喪天下之達禮也春秋以來有墨而從軍者焉爾身都戎幕適值內艱矧當多壘之秋盍用奪情之典其還舊次移孝為忠可

趙葵降授中奉大夫依舊兵侍兼淮東制置使

制

勅褚裒指泗口以出征咸謂中原之可復彥之得河南而不守坐隳成業以空還每思古人深惜事會具官某志非不勇才亦長雄戮鯨鯢于淮甸之東共推忠壯將驅虎于渙河之北自許馳驅既收應天復擣清汴所宜撫新附弔遺黎峙糗糧而足軍彊士馬以待用而貪功向洛值寇突防九畿之藉既歸旋聞再失兩軍之士未

慙亦復俱犇總戎若斯為國何賴姑正二階之罰以符
衆論之公儻能思過於箕谷不戒之初尚可圖功於穀
師既敗之後可

趙葵敘復太中大夫依舊兵侍淮東制置使知
揚州制

勅秦不以孟明于穀之敗而復其政晉不以林父于邲
之劫而復其官矧有道之清朝無棄人之絕法具官某
以熊羆之帥握龍虎之韜自城維揚常志漠北仗鉞以

清河洛之境志氣甚雄班師而迴毫泗之墟威名稍減雖勝負兵家之常勢然刑賞王國之大權有過則鐫以勞而叙况邊聲之靡定而國步之斯頻所在兵驕因之財匱弟兄相友二龍既共卧於轅門將士貴和兩虎豈宜鬪於私室各攄忠憤協濟艱難可

范用吉叙復武翼郎高州刺史制

勅具官某賞罰軍國之紀綱邇者洛師之敗坐視弗救爾之過也久任邊面仗義來歸爾之功也功過不相掩

庸威不偏用朕何心哉甄叙元階勉思來効可

王夬亨叙復通直郎差充沿江制機制

勅具官某觀遠臣以其所主向者爾倅合肥控於吏議
今沿江帥臣謹簡機幄而以習知疆事聞觀其所主則
其人可知矣甄叙元階往裨密議可

顏幾叙復通直郎知瓊州樂會縣制

勅具官某觀遠臣以其所主爾向者試邑廣右綏御黎
人能服其心咸以父事前經畧使胡槻以其議論弗同

而劾之後經畧司丁黼等以其籌畧可采而進之觀其所主而其人可知矣甄叙元階仍宰故邑固欲安之也可

夏全叙復武功郎特添差京西路馬步軍副總管襄陽府駐劄制

勅具官某山東義旅本皆孝子順孫逆雛背恩相挺為亂至使爾等舍樂郊而北去爾既回心向順矣國朝春育海涵念其窮而歸我特叙元階仍總軍政彼死安用

尚與節度若汝能生立奇功則高官厚祿朕又何愛焉
可

全子材降授朝散大夫落直秘閣差知隨州制
勅淮西安撫使全子材始躬率戎士繇淮埭渡淝水登
北狼山涉項城胡子之國轉戰數千里遂臻汴都爾亦
自謂一世之雄也而輕於向洛倉猝遣軍敵之兵力方
交我之師心已潰春秋責帥爾尚何辭其上四階降為
漢東太守可

黃孟先降授朝奉大夫周汝霖降授朝請郎制
勅具官某等昔陸餘慶罷魏州有車一乘圖書半之此
士大夫去官法也爾孟先提舶廣南爾汝霖司臬湖右
不能酌貪泉以自勵而乃總貨寶以自豐被論得祠宜
發深省又復航琛輦贖以歸私室視餘慶豈不醜顏乎
各鐫二秩以懲百吏可

馬執中降授朝奉大夫虞方簡降授通奉大夫
高泰叔降授朝議大夫鮮于光降授朝請郎制

勅具官某等周以歲會考四國漢以殿最課郡縣我孝
宗皇帝以臧否攷察郡守事實皆良法也朕捐四蜀之
賦供餉西師日告匱乏爾等不思庚癸之呼而網解稽
違動失期會王人課殿來上豈容不少懲以存體統可
蔡廩降授朝請大夫方淙降授朝請郎落閣職

制

勅具官某等行輕則招辜揚雄所戒進銳其退速孟氏
所譏爾廩少年入仕足高志揚爾淙蚤歲登科神躁心

蕩坐享豐腴連典名郡弗自謹飭賄賂章聞其所以致此者輕與銳成之也臺評屢上朕不敢私各上一階罷祠褫職庶幾德薄而位尊者亦知所警也可

趙汝楨降授朝散大夫黃漢章降授宣教郎制勅具官某等科舉之法自唐已弊矣若士以正應有司以公取則法雖弊而人猶未弊也今言者謂汝楨之請托漢章之徇私則有弊人矣朕方革去舊習以新美多士則汝等一階之罰尚何辭可

郭伯良降授朝奉大夫楊垓仲降授朝散郎制
勅具官某等周官以歲會攷歲成以詔廢置此殿最法
也爾等仕於閩中既以殿聞罰其可追哉各鑄一秩以
警慢官可

鄒應龍落徽猷閣學士制

勅黷能極言以補禁闕之缺而居官亡以瘡人域能引
誼以辯忠臣之誣而為政率書下考今有仕為侍從中
外踐更直聲夙著於朝端治行弗聞於州里是不可以

一青而廢其德也具官某蚤擅掄魁之望偏儀華序之清三仕於朝獨行其道在嘉定時則有封駁皇子之疏在寶慶時則有留行侍臣之書風節之高措紳所重豈期去國之後曾乏好仁之稱居鄉無睦婣任恤之聲治郡無豈弟循廉之譽紛臺章之交上凜王度之靡容肆從公言姑寢新命爾其充儀朝之德美以善俗勵事君之節操以表民勉圖令猷以俟褒詔可

吳潛落秘閣修撰制

勅朕惟祖宗舊典舉進士第一必歷三司鹽鐵使王蔡
諸人尤其顯者雖榮貴素定而必煩之以財賦之任盖
所以老其才也爾以掄魁之彥出都賦輿當軍餉急迫
中乃能捐民租至八十餘萬可以為難矣朕方擢承密
旨以旌其勞而言者謂汝違道干譽朕亦安得庇汝耶
雖然往蹇所以來碩習坎所以維亨爾其再思以俟復
用可

吳淵落右文殿修撰制

勅具官某左立明謂元凱為才子揚雄謂公儀仲舒為
人才之首才固未嘗不善也而過用其才則咎之招也
爾名父之子膚敏好修真之省闈見謂才選而乃不自
韜晦好多上人紀綱之地不以心競而以力爭汝安得
無過歟落書殿罷寶治所以王汝儻能思牝牛之為吉
知未難之為全則用之未晚也可

吳愈落煥章閣待制制

勅朕聞長江備風寒不過數處尤重武昌元帥閱禮樂

使將中軍何拘文法若身謀之太甚亦邦憲之靡容具
官某奮自儒家驟升朝列舒徐和緩雅宜豹尾之班福
厚竒麗似有虎頭之相然而色莊而膽薄志廣而材疎
蒙衝壞而不修卒乘單而不補金刀龜貝不以資國用
而以厚橐裝竹屑木頭不以備軍需而以營第宅但有
問舍求田之志曾無誓江擊楫之風以若所為難勝其
任爰覽抨彈之疏遂從褫罷之文尚為寬恩庶發深省
可

衛樸降授朝請郎趙汝捍落閣職制

勅具官某等監司列郡之儀表而京漕又諸路監司之儀表也爾樸名父之子輕儇疎爽爾汝捍天族之支機巧健決亦號治辯觀風畿甸不務廉平以風四方而捲公府之金以自豐事鞭靴之饋以媒進使人人累數其過於有司朕豈得庇汝耶貶秩罷祠肅儆羣慝可

翟朝宗降授州團練使制

勅朕聞周禮有馭臣之柄春秋存責帥之文苟戾綱常

曷逃憲法具官某曩從領閣出典維揚以輕儇之資當
重大之寄邊人有警既不能援桴鼓以出征戎帳無籌
但只欲歛金帛以求好爰觀吏議合宜嚴誅尚念嘗侍
軒墀彌歷歲月姑削停于祠廩仍降授于戎團是曰寬
恩免圖來効可

荆世顯降授中官正周奕降授春官正制

勅具官某等以主測景日官職也夏政典以先時不及
時者無赦矧國有大事分陰不容以毫釐紊爾尸厥官

貌焉視之不職甚矣其下一階以戒食焉而怠其事者可

沈傑降授保章正制

勅具官某昏迷于天象古有常憲爾相我文母山陵之事而圭測不虔晷度差舛失職甚矣姑鑄一級以警曠官可

劉燧可特授拱衛大夫依舊和州防禦使致仕制

勅束帶立于朝服勞滋久安車致其事敷奏甚勤具官
某端粹而靖夷肅莊而嫺雅從容二閣周閱兩星與賓
客言方喜儀章之慎慎勞侍從事乃祈心志之休休遂
升拱衛之班仍領扞防之秩庶華而老以廣朕恩可

著作佐郎兼權屯田兼崇政殿說書葉味道特
授朝奉郎致仕制

勅具官某朕承先帝聖緒涉道未深嘉與四方耆雋之
士講論經理而師意指殊聖真未一惟爾行誼純淑源

流深長熹之四書洞究精蘊朕方以為得師而遽致其
事寧不憮然今燔已議禮飭終幹亦欲尊名賜諡况汝
日侍金華親相啟沃則晉一階以華其後尚何愛焉可

王用亨授武翼郎閣門宣贊舍人致仕制

勅具官某親親賢賢此周家享國之道也爾敬謹祗恪
廩乎祠官厥疾弗瘳欲掛冠神武門外朕以其為榮王
戚屬豈不念之晉陟一階賓贊上閣以致其事可

鍾武授武經郎致仕制

勅具官某少而陳其力病而養其衰固人情之所欲也
况爾沈毅而勇練通而明以淮南副戎貳郡東海拊麾
安集備著勤勞今以病聞乞致其事朕心憫焉陞之一
秩以華其退宜專輔養期以永年可

翟朝宗叙復潭州觀察使致仕制

勅朕惟明哲保身詩人之至戒見險知止易卦之格言
矧惟擢胄之臣亦識垂車之義露情如此撫奏惻然具
官某本以中才班於上閣束帶而語賓客進若有文據

鞍而問甲兵退如不武雖忝熊羆之師曾無虎兕之防
人得致疑朕難廢法爾今駸駸加病惘惘輸喪欲思末
路之免慙乞以前官而上事鳥哀鳴於將死誰閔厥勤
鶚無毀於卒荼復還其舊庶幾沒齒仍戴寬恩可

張鑑追復奉議郎致仕制

勅具官某國家以法繩士大夫而以恩綏之未有終身
放焉而不齒者也爾勲臣裔孫逮事先帝文雅才藝殊
無將家之風一債二紀遂死瘴鄉士之不幸亦可憫矣

盡復元官澤及後嗣君蒿如在光寵知歆可

欽定四庫全書

鶴林集卷十

宋 吳泳 撰

外制

皇叔祖多謨父居端贈太師制

勅明堂祀上帝已迎申命之休斂福錫庶民式需漏泉
之澤眷言近屬申賁禰宮具官某故父某英祖之支吳
王之裔甚德而度不訾朝會之儀大盈若沖弗倨留臺
之貴雖抱才而未究然積慶之有傳是生嗣賢相我熙

金史卷之八十二
卷十
事用哀大享之祐以為幽局之榮太師維垣位既躋於
一品聃季授土封仍襲於大邦營魂有知服命無斁可

皇叔祖多謨母任氏魏國夫人制

勅朕宗祀明堂均慶宇內睠予同姓之老可後顯親之
恩用遵舊章申錫愍綏具官某母某氏稟性柔惠處身
儉慈出自德門嬪于天族是生令子相我肇裡鴻霈誕
敷易函秦之舊壤龍光疊被開全魏之新封尚其淑靈
歆此休命可

皇叔祖多謨妻聞人氏封齊安郡夫人制

勅朕受釐祉均慶公卿大夫之家而況宗婦之懿夫尊
於朝者乎具官某妻某生自華胄嬪於德門飾珩璜象
服之儀躬沾沍采繁之薦見之內助藹有芳猷茲熙事
之展成宜龐恩之覃被正二品小君之位啟齊安大郡
之封茲謂徽章勉服休命可

皇叔祖多識贈開府儀同三司追封崇國公制
勅朕磐石奠國寶玉展親生則累茵列鼎以疏榮歿則

襚印蜜章而廣孝可無愍飾式賁營魂具官某躬雅靜
之姿肖神明之胄讀河間之書而道之以學履江夏之
貴而守之以謙久持節鉞以奉朝乃畀祠庭而主祭天
胡不憖人遽云亡永懷同姓之宗特廣漏泉之澤既秩
之以儀同之禮復胙之以崇國之封茲謂徽章祇服休
命可

皇伯希瑛贈開府儀同三司杞國公制

勅仁莫厚於睦親義莫隆於追遠朕率是道以綏有邦

雖云屬籍之疎亦懋飾終之典具官某躬有常之行居
不競之途敬謹威儀弗恃廉車之貴緣飾儒雅藹如素
士之風曾不遐年奄至大故儀台視秩昨國啟封知無
及於生前尚有光於身後靈而不昧式克歆承可

皇伯希瑋父師鈇贈和州防禦使制

朕躬執瑄幣祇見泰壇式裒帝休均慶有位肆予助祭
之老可後顯親之恩具官某蔚為宗英綽有雅度自秉
靖共之操習亡禮義之愆官不滿能報在其子用進兵

防之秩以為泉戶之華營魂有知膺受亡數可

皇叔希範贈少師追封咸寧郡王制

朕適祇先猷篤叙同姓生則展寶玉之愛歿則裂茅土而封爰錫愍書以賁幽壤具官某肖神明之胄躬雅靜之姿讀河間之書甚德而度履江夏之貴大盈若沖久持節鉞以奉朝乃畀祠庭而佚老云何不淑惟此閔凶永懷死喪之威特異哀榮之數冠之以左棘孤卿之位疏之以蜜章三禩之恩尚其英靈歆此休寵可

皇叔希館贈少師追封郡王制

勅三雍宮之賜對漢河間以儒雅稱五原塞之耀兵唐
江夏以功名著若匪一時之顯擢則將沒世以無聞朕
於宗族之賢不以死生而間錫茲愍冊賁若幽局具官
某帝胄之潢天孫之嶽被服儒素蚤有能文之聲奮身
仕林泊無負貴之習而況夙閑戎務屢罄嘉言方提軍
以遏峒寇之披猖真儒者之勇將謝事而論禁兵之單
弱尚宗臣之心朕於初潛之時屬爾大雅之望云何不

淑慝此閔凶既生不能胙土之封則歿當有蜜章之襚
爵隆五社秩冠孤卿豈獨慙九泉之思蓋將勸庶邦之
義可

故巴陵縣公竑追復少保寧武軍節度使濟王
食邑四千戶食實封一千五百戶制

勅朕惟昔我太宗友於秦邸貶涪陵之秩不能廢天下
之大公追王爵之封於以篤人倫之至愛周公之聖所
未及文帝之仁所不如肆于沖人式是祖訓具官某蔭

分天屬職重宗藩以梁爵之親方受食國居官之寵若
東平之樂庶堅處家為善之思事有不然人所共歎遽
以一朝之變迫於羣狡之謀州無謹備盜賊之臣府無
康正禮義之傳竟底於戾如痼乃身朕嘗謂仁人無藏
怒宿怨之私王者有因心則友之愛還錫青旌之節仍
疏赤社之封賁以孤卿胙之采邑孝悌之教不改予其
昭示於本心死喪之威孔懷爾尚式歆於異數可

皇伯希璋妻鄭氏特封郡夫人制

勅朕惠綏邦族燕及家人班視袞章既慰元侯之贈榮
加翟帝載疏宗婦之封越諸丕彝華以異數具妻某氏
秉心婉嫕率履端良生於德門姆訓不越作配天屬相
範有嚴合巹偕老之詩俄賦栢舟之什朕興嗟既往加
勞生存用覃石節之恩特畀小君之寵服予休命保爾
壽祺可

毛氏以皇后謁家廟恩特封國夫人制

勅朕遙祇先猷嘉惠左戚擁翟車而歸謁既遵乾道之

彞疏綸誥以展親率用紹興之典推本慶源之自宜加
寵數之隆具位某氏性德柔嘉丰儀燕婉不愆於履尚
聞松閣之清風有淑其聲肆衍椒塗之芳潤用循故實
載昇恩章久荒大國之封茲錫嘉名之寵承予異渥燕
爾壽祺可

皇叔希邈故妻石氏贈碩人制

勅合宮備享熙事沆成厥有同姓之卿實修助祭之職
可無駿惠賁及私庭具官某妻某懿範出於名家柔風

著於中梱式相其事亦云有年既不誦君子偕老之詩則宜受碩人其頤之祉尚其盼蠻來服寵靈可

趙氏改封東平郡主趙氏改封文安郡主制

勅婦從夫爵古之誼也惟內女之婦者則爵邑不繫於其夫具官某妻某氏素含柔風率用祇德飭珩璫之佩不愆於儀共蘋藻之羞動合乎禮永惟文母班祔皇姑用疏戚畹之恩仍開湯邑之寵爾其思貴名之難保戒寵祿之易驕則於有家永其無數可

同知樞密安丙賜謚忠定制

勅班超數征西域而生不過定遠之封葛亮時出秦川而死僅加忠武之號能兼二美代不數人具官某本以儒癯荷茲戎重其魁竒足以開物成務其沈毅足以禦侮折衝奉詔而討元凶幾白髮時之髮奮身而誅羣盜益丹報國之心爛然殊勲載在盟府朕每念寧考圖功之志若稽先朝恤往之恩義莫重於輟朝仁莫榮於詔葬猷惟謚典扼以柄臣屬多壘之未清捐遺忠而慨

歎蔽自朕志錫之尊名以旌慮國之勞以示安民之灋
噫咸平之於張詠曾著徽稱嘉定之於汝愚亦昭異數
蓋存則有勲勞於四蜀而歿焉無愧怍於九泉以此誅
卿庶幾稱德可

史彌堅賜謚忠宣制

勅朕惟漢以共節謚韋賢韋成而弘之行不顯於世唐
以正憲謚蘇瓌蘇頲而詵之名不聞於時今有父為忠
定兄為忠獻而抱元身之直處翁季之間生不失天下

之令名死復都朝廷之美號茲豈韋蘇之門所可望哉
具官吏某以八行之家居四明之望速事寧考曾為從
臣機神足以爽邦文雅足以飾治入則戮冠簪筆謀猷
于內惟汝嘉出則握節秉麾左右有民惟汝翼雖游更
中外之任嘗力避權勢之嫌在熙寧則不黨於熙寧如
安國之於安石在元祐則不趨於元祐如大臨之於大
防雖鍾和樂之情不替箴警之義肆予嗣服恨弗即庸
至一紀之投閒竟九原之弗起嗟無及矣痛莫甚焉既

疏之以資殿之榮復秩之以儀同之典仁莫先於追遠
哀慟已刻於蜜章義莫重於易名尊顯復獻於匱謚不
待頌臺之議特加親劄之褒噫惟純仁之憂國愛君始
膺異數惟洪皓之銜命仗節方稱嘉名毋俾兩賢獨專
二美可

趙方賜謚忠肅制

勅朕聞真才之生宇內疾沒世而無稱公論之在人心
至闕棺而始定弗詔嫩號曷昭元勛具官某磊磊人中

之豪奇塞上之寶逮事寧考作鎮襄州由唐鄧以圖
中原無與賊俱生之志援江淮而連巴蜀有鞠躬盡死
之心勤勞十年忠恪一意奈規恢之未半忽殄瘁之興
悲朕方聽鼓聲而思將臣閱禮樂而謀元帥每嗟一老
恨不同時涕連南峴之碑愛及西平之子雖不壯行不
銘墓固往哲之高風然以壹惠以尊名尚先王之成憲
肆舉飾終之典用彰成德之休夫慮國忘家之謂忠正
已攝下之謂肅合茲二美賁於九原噫執爵以懷羊太

傳之功託旒以著楊荊州之誅尚旌既往以勵方來可
鄭性之曾祖已贈太子太保制

勅立公設輔惟其人尤重副樞之選自仁率親至于祖
莫如皇考之尊既欽四鄰式賁三廟具官某曾祖具官
某鍾全閩之秀襲大鄭之芳蘊德未施流光在後詩書
浸灌登唐朝童子之科議論深長策漢世名儒之第今
以輔臣寵數追遠蜜章進儲宮上保之官為宗廟不祧
之祖英靈如在彷彿其承可

鄭性之曾祖母陳氏贈太寧郡夫人制

勅生珠之淵必深棲鳳之岡斯遠慶流三葉積豈一朝
具官某曾祖母陳氏躬嫻令儀世載淑聞繫以北陳之
譜不顯其光嬪于南鄭之門克昌厥後參我右府實其
曾孫易以大郡之封仍以小君之號吁其盛矣尚克嘉
之可

鄭性之祖獎封太子太傅制

勅鄭康成以經術名世而小同官至侍中鄭餘慶以文

學致身而從黨位登輔相均以諸姬之後至于再世而
昌遺風甚高千載如在具官某祖具官某植道淳固立
心裕和語言文字之香遠追作者翰墨箋題之妙自成
一家眎軒冕如儻來期門問之必大偉哉孫子時我寶
賢誕疏西府之恩晉陟東宮之傳申命有寵尚其知榮可

鄭性之祖母陳氏贈文安郡夫人制

勅朕誦莫莫葛藟之詩觀離離桐椅之什一則原世德
之自起一則喻孫枝之既蕃若非栽培何以貽燕具官

某祖母陳氏淑謹恭儉宜其室家碩大光明茆在後裔
推跡施予之祉載流烝畀之榮前則魚軒象掃以新石
窳之封今則蜜印絲言以大任丘之寵用昭愍飾式惻
孝思可

鄭性之父汝永贈太子太師制

勅鄉之善士斯友善士既培積慶之源子為大夫祭以
大夫允重顯親之義肆登近輔申賁禰宮具官某父具
官某在約而平寬居家而敬謹乘下澤御款段不好矜

持崇高節抗浮雲每安冲澹能教其子克昌斯文采與
階齊卒兆龍頭之選木臨匣口竟占樞字之祥嘉其義
方式是恩寵仍進宮師之秩永為泉隧之光可

鄭性之母黃氏贈和政郡夫人制

勅朕聞教順由親始當推六行之原積善以家言蓋匪
一人之力睠言賢輔實自母儀具官某母黃氏齊明靚
莊淑婉循嫗奉姑以柔嘉之則教子以忠孝之言終有
令名為吾良佐雖生不逮釜鍾之養而歿猶疏湯沐之

封古岷大邦象服休命尚爾泉丘之秘知吾渥澤之臨
可

鄭性之妻潘氏贈平原郡夫人制

勅朕惟夫尊於朝婦貴於室今古一道死生同榮具官
某妻潘氏笄珈象服之美以宜其夫宮釜潢汙之清以
相其祀中饋爾職嘉嬪爾共方當夫人之起家亦念君
子之偕老命之不淑榮弗逮躬載言翟茀之空莫睹鴻
樞之貴晉封名郡用賁窈臺庶幾蘭蓀之共芳不與草

金史卷之八
卷十
木而俱盡可

陳卓曾祖嘉謨贈太子少保制

勅朕惟太微四星天樞為近大夫三廟皇考實尊既膺基命之榮當衍曾門之慶具官某秉哲迪義為時聞人抱道而不永于年守官而不究其用蔚有善行施于曾孫為吾宗工晉登宥府載舉飾幽之典以伸追遠之思班之宮寮華爾泉室尚其營魄知享寵休可

陳卓曾祖妣黃氏贈上饒郡夫人制

勅朕妙東耆儒進登密席異數絕百寮之表愍章疏三世之恩某氏嬪于德門懿彼閭範淑謹恭儉宜其家人碩大光明流于後裔集有曾孫之慶出為二府之臣種德之功其報不遠載錫小君之命仍疏大郡之封靈如有知歆我殊寵可

陳卓祖膏贈太子太傅制

勅朕惟陳欽以議法名世而寵至司空陳實以好學致身而羣為輔相均曰有媯之後至于再世而昌遺風甚

高千載如在某植道淳固立心裕和漫仕周行班甫升
於卿月退居里社光已鏤於德星獨留手澤之芳衍作
孫枝之秀陞華宥府為時名臣是用伸其尊祖之心需
我漏泉之澤特進居文階之首雖衍舊封太傅極官臣
之榮載加新命是為異數以發幽光可

陳卓祖母汪氏贈魯郡夫人制

勅朕惟流之長者其源深葉之茂者其光沃矧方崇尚
孝治登庸樞臣肆以施于之恩飾其烝畀之典某氏躬

有懿行嬪于名卿其在母家則克勤女工其相君子則
藹著梱範可以為仁矣是宜有後哉故生文孫作我近
輔用賜周公之宇以華小君之封熒然寵光懌此柔魄
可

陳卓祖母蔡氏贈魏郡夫人制

勅朕疇庸碩輔推本慶門徂賚孝孫則惟其賢烝昇祖
妣則飾以禮誕頒愍冊追賁幽局某氏雲仍上蔡之家
天合有媯之後滋植德本有開後昆是為樞臣參我國

柄仍小君之舊號開大名之新封尚惟淑靈其克嘉享
可

陳卓父居仁贈太師制

勅朕惟事君以道父所以教忠揚父之美君所以教孝
矧予禁從之老載陟樞密之庭率循舊章追賁禰廟具
官某器資端亮才識敏明自著武於清班遙躋華於要
路在孝宗時則入侍甘泉之橐在光廟時則出分元帥
之麾王言如絲出如綸鳳銜密命大蕃為屏宗為翰虎

踞上游官未滿能晚而謝事慶流哲嗣晉陟洪樞弘化
貳公雖積承於愍冊維垣極品茲加賁於蜜章尚其幽
扃歆我明命可

陳卓嫡母王氏贈鎮國夫人制

勅國以賢為基母以子而貴矧予近輔晉翊鴻機既頒
異恩以隆陟岵之報可無愍冊以慰凱風之思具官某
故嫡母具官某氏女德婦功為世間範有光彤管之訓
不愧采蘋之詩即其宜家是以有子因陟樞庭之始載

疏石節之榮爰易郡封奄受方國尚其柔魄歆我休光
可

陳卓所生母俞氏贈新安郡夫人制

勅春秋之義母以子貴今吾閭老登進宥密之庭豈忘
祿章慰其劬勞之感具位某氏淑婉有儀恭勤不懈輔
佐君子極於顯榮載生名賢沆至鼎貴是用循國家之
舊典易小君之新封尚惟淑靈歆我休命可

陳卓妻林氏贈信安郡夫人制

勅朕疇咨公望登進儒臣書殿隆名既畀以機密之柄
祿章異數又伸其伉儷之私具官某氏以嘉定從索之
家淳熙侍臣之子克謹婦道相成夫君曾未賡偕老之
詩先已賦悼亡之什鴻樞之榮不見象服之禮未宜茲
吾輔臣盖有遺憾小君示寵大郡啟封倘逝者而有知
尚服之而無斁可

沂王夫人俞氏父俞治贈潭州觀察使制

勅朕惟若昔厚陵加惠濮邸凡仙游之若父若母皆與

封贈蓋先制也矧沂王夫人之親其可緩愍章耶具官
某稟姿端醇與物和裕蚤緣姻婭逮事先朝朱閭通班
夙著舍人之樣戎團分總歿躋諸使之榮茲誕霈於隆
恩復陞華於廉察九原有識尚克知歆可

沂王夫人母劉氏贈惠國夫人制

勅朕

云云
同前

蓋先制也矧予近戚可緩愍章耶具官某妻

某氏性稟柔嘉躬履慈儉藹有閭範以昌德門是生淑
媛妃我沂邸茲覃異渥用賁幽局仍小君之舊封開大

國之新命淑靈未泯寵數欽承可

何進特贈節度使右金吾衛上將軍制

勅朕收圖書而知阨塞之處每嚴蜀道之防聽鼓鼙而思將帥之臣必及山西之彥云何中道忽喪元身具官某朴忠而有謀真勇而無敵身鏖百戰曾收蕩寇之勲義激三軍時有滅讐之志當北騎潰防之日正王師思奮之秋而功力常分於備多事機屢失於遙制遂賁忠憤竟死封疆昔李廣之歿而三子為郎張巡之亡而百世

廟祀朕之恤汝無愧於斯更加雙節之榮復班二品之貴以甄壯烈以勵貪夫可

趙傳夫弟伉夫父彥軾贈特進制

勅朕躬執瑄幣祇見泰壇雖當恭默思道之時不廢齊明承祀之典嘉與文武之士均其神天之休具官某蔚為宗英綽有雅度抱才自處官不滿能積慶所鍾報在其子或踐武階之峻或登禁橐之清推迹本原用彰愍飾進其位叙特以上公是為泉壤之華且慰霜露之感

可

趙傳夫母段氏贈定襄郡夫人制

勅朕讀蓼莪銜恤之詩觀闕宮燕喜之頌一以不得終
養為戚一以既受多祉為榮推原人情是有贈典具位
某母段氏柔嘉淑謹式是閭儀溫敬齊莊共于典祀命
之不淑沒有餘哀用開大國之封仍正小君之號不但
惻思親之望庶幾廣教化之仁可

趙傳夫母連氏贈秦寧郡夫人制

勅嚴父配天國之大典以子貴母古之彝章矧茲禁從
之官相我明庭之祀尚何愛於爵賞不以成其孝思具
位某母連氏淑謹有儀柔嘉維則親執錡宮恭儉以相
其夫篤好圖書仁愛以昌其後生不終養沒有餘哀載
疏大國之封庸正小君之號九原雖邈不顯其承可

翟朝宗弟崇故父顯贈保康軍節度使制

勅朕躬執瑄幣祗見泰壇喜與文武之臣均共神天之
慶用裒祭澤申賁禰宮具官某以武發身以仁裕後戎

容暨暨生不侯封蜜印煌煌沒以子貴茲因宗祀重衍
慶條再頒鵲綬之華益侈鬣封之寵靈如未泯休克歆
承可

翟朝宗嫡母杜氏贈信安郡夫人制

勅朕惟嚴父配天國之大典以子貴母古之彝章用敷享
帝之休爰霑漏泉之澤具官某母某氏挺生望族來嬪
慶門均具鴈鳩之仁毓我熊羆之士茲汔成於熙事宜
申錫於愍書正位小君啟封大郡柔魂未泯茂渥其承

可

鄧彭年贈節度使制

勅朕惟爵祿天下之公器也勸功懋賞未嘗以私暱之
愛而妄加送往貶恩亦不以近習之嫌而終廢具官某
提身謹飭植志忠勤粵自淳熙已服勞於南內訖于嘉
定遂參領於北司久矣投閒奄其淪謝朕念先朝之簪
履特頒內府之節旄用招嘉魂式賁泉路靈如有識尚
克祇歆可

李大昌加贈武康軍節度使制

勅國朝舊制非勲績顯著者不除節鉞渡江而後稍寬矣
若贈官則所不吝也具官某忠實敬謹諳於吏道事朕
初潛歷年滋久以攀附之勤當享遐福命之不淑遂至
云亡則亦可傷矣賜之旌纛姑示飾終之典可

麻申特贈武功大夫遙郡刺史制

勅具官某朕置武功之賞以寵戰士聽鼓鼙之聲而思
將臣既陷元身可無愍典爾本山西之傑馳漠北之名

破敵旗邊曾著先鋒之號受降城畔更無匹馬之還方
北騎之窺闕擁白丁而赴敵但知報國不惜捐軀雖一
門之死者數人而勦敵之退者三舍勲名如此豈不偉
歟立岑彭之祠官李廣之子朕於何進既率用厥典矣
爾進之儔也則甄錄二階追封遙刺朕又何愛焉可

李虎母高氏特封咸安郡夫人制

勅昔張遼進爵鄉侯厥母亦蕃錫車馬諸屯將吏悉羅
拜道周史冊書之以為榮觀今有身都大將親號小君

較之前聞無所與遜豈不兩盡其美哉具官某母某氏
儀家以正守節而堅為人謀而忠烈何慚於伏劒與子
言於孝勞不止於斷機慶綿後昆官至刺史積五年之
恩數貶一秩於慈闈朕之錫汝之受皆宜也上承天寵
下慰子心可

鍾震弟霖父將之贈宣奉大夫制

勅君子思孝篤於親而民仁聖人廣恩敬其父則子悅
式哀祭澤申賁禰宮具官某父某擷儒之英蹈道之正

勤於講學撰先生之履以從遊志在濟民易大夫之簣而後已仕皆由禮爵不滿能是鍾禁索之賢來相明庭之祀既合棣華之韡韡宜加蜜印之煌煌上崇二品之階下漏九泉之澤靈其不昧式克歆承可

鍾震妻鄧氏贈碩人制

勅朕合宮沆享熙事備成厥有秉文之臣實修助祭之職可無駿惠賁及私庭具官某故妻某氏清範出於名家柔風著於中梱式相其事亦云有年既不誦君

子偕老之詩則宜膺碩人其碩之報尚其彤鬋來顧寵靈可

馮氏封碩人制

勅讀閔宮之詩曰魯侯燕喜令妻壽母夫既不能以養親為壽而僅得以宜家為喜者亦人之情也具官某妻馮氏生自華胄嬪於德門鼓琴瑟和樂之音粲珩珮委蛇之度供大夫之祭既享於成衣碩人之衣實稱其服益思謹淑以保爾有家可

劉芥贈武功大夫某州刺史制

勅朕聞春秋書潞子之爵漢史紀弓高之封既曰來臣
何愛飾典具官某生於異壤慕我中華方闕河懷赴之
秋有唐鄧來歸之報迎王師以簞食誠出本心解辮髻
以衣冠欲霑聖化方報功之未幾遽掩骼以云亡爰贈
武功并陞遙刺以示納降之典以恢懷遠之仁英魂有
知尚式時享可

葛氏封宜人制

勅具官某妻某氏朕修文德以來遠人不間臣妾爾生
自異域嬪於貴臣慕義來歸亦期偕老豈圖中道忽殞
良人宜疏命婦之封以示皇恩之渥可

李復明贈忠州刺史制

勅具官某北兵慢防奄薄荆渚爾以統兵官憤敵深入
出鬪於城闔之西武功雖多而元身亦殞可謂死於義
矣陞刺望藩往旌毅魄可

俞東贈修武郎制

勅具官某朕追惟藩邸嘉惠近親生錫異恩死彰懿飾爾亦肺腑親也降年弗永官不滿能載陞八品之階式漏九泉之澤尚其營魄歆此休光可

馮履特贈直祕閣制

勅具官某昔邵子雍聞鶯鳥之聲而占氣運因木葉之動而起時數聲音之學蓋與造化相流通非深於易者不能知也爾蚤以爽邦之英遽於先天之數聲文韻法尤所究心當權侂用事時課歷之差議祭之變推測虹

見之咎瞭然如指諸掌至於進退不以吉凶行違不以憂樂則又在於經世圖外惜乎此道孤行無有褒表之者朕用盼慰典俾真祕丘尚庶幾豐道植教之意可

王氏封碩人制

勅朕肇裡國陽均福方外屬我臣妾一視同仁具官某妻王氏生自殊鄰嬪於貴胄能佐而長慕義來朝車書既同冠帶不異則疏碩人之寵以對廉使之華亦其宜也毋貳爾心相勉以義可

趙氏贈安人制

勅某氏婦從夫爵死生一也國有湛恩於是有不從夫而封贈者焉爾榮王近親有淑其行降年不永至於云亡再疏命婦之封庸侈泉扃之寵柔魂未泯尚克知歆可

傅宗道母陳氏封孺人制

勅具官某母某氏朕宗祀明堂均慶宇內凡我小大之臣舉得以寵綏其父母焉爾積善蘊仁年過九十在官

有子際此異恩用賁徽封益恢壽嘏可

吳洪道父權授保義郎母陳氏封孺人制

勅具官某父母某漢禮高年九十者已為異數矧父母之年又加於九十者歟爾紹興遺民蘊仁積善年者德明至於偕老是宜日有秩也初品之封爾其篤受可

贈高年制

勅王制以五載存問百年國朝三歲大禮應士庶年百歲而上特與補初品官尚三代遺意也爾積善於身

享仁者壽吾何愛一秩不以慰而子孫其承寵休以燕
遐福可

贈婦人高年制

勅王制以五載存問百年國朝三歲大禮應士庶年百歲
而上特與疏封尚三代遺意也爾齒於編氓獨享上壽
非慈仁好善何以登茲錫之嘉號以慰而子孫可